

## 2004 чылдың ийги чартында өз-бүле бүрүзү "Шын" солунга чагыдылгалыг болзун!

Ийги чартык чылда чагыдылганын өртээ:

**КОЖУУННАРГА ЧАГЫДАР ӨРТЕКТЕР**

Хууда чагыдыкчыларга:  
6 айда — 282 рубль;  
ооң иштинде редакцияга—  
120 рубль,  
почта чедирилгези—162 рубль.  
3 айда — 141 рубль;

**пенсионерлерге почта чедирилгези**  
25 хуу чигелделиг  
6 айда — 242 рубль;  
3 айда — 121 рубль.

**ОРГАНИЗАЦИЯЛАРГА:**  
6 айда — 333 рубль;  
ооң иштинде редакцияга—150 рубль;

почта чедирилгези—183 рубль.  
**КЫЗЫЛ ХООРАЙНЫҢ ЧУРТТАКЧЫЛАРЫНГА:**  
6 айда— 288 рубль;  
ооң иштинде редакцияга —120 рубль;  
почта чедирилгези—138 рубль.  
**пенсионерлерге почта чедирилгези**

25 хуу чигелделиг.  
6 айда — 224 рубль;  
3 айда — 112 рубль.

**ОРГАНИЗАЦИЯЛАРГА:**  
6 айда — 288 рубль;  
ооң иштинде редакцияга — 150 рубль;  
почта чедирилгези — 138 рубль.

**ЭКСПРЕСС чагыдылга-биле айның кайы-даа хүнүнден эгелеп солунну чагыдып ап болур.**



# ШЫН

**НИИТИЛЕЛ-ПОЛИТИКТИГ СОЛУН**

1925 чылдың август 31-де үнүп эгелеэн

№ 119 (16892)

2004 чылдың АГУСТ 26, четверг

Номерни парлагаже дужааганы:  
график езугаар — 21.00,  
херек кырында — 16.30.  
Садар өртээ 3 рубль.

### Көдээниң ишчилеринде

## НААДЫМГА КИРЖИРЛЕР

Бай-Тайга кожууннуң көдээ ажил-агыйынын ажилчыннары республиканың юбилейлерин төлөптиг уткуур дээш бо чылын кызыл ажилдап турар. Ажылдың түңнели багай эвес деп чүвени сөөлгү социал-экономиктиг көргүзүглер херечилээн. Кожуун 706 га черге тараа культураларын, 296 га черге картофельди болгаш 39 га шөлге ногаа аймаан тараан, бистиң санап турарывыс-биле алырга, оларның бо чылын үнгени багай эвес. Ам бүгү дүжүттү чүгле чидириг чок ажаап алгаш, сайгарары арткан. Күскү тараа дүжүдүнүң 2 тонназын келир чылга үрезин кылдыр шыгжап алыр сорулгалыг бис.

Мал чеминиң белеткели ажил-агыйларның бүгү хевирлеринде кидин түлүк чоруп турар. Бо чылын ниитизи-биле 4400 тонна сиген белеткээр планывысты күүседиптер аргавыс бар.

Кожуунда 5 көдээ ажил-агый бүдүрүлгези, 10 көдээ ажил-агый-бүдүрүлгө кооперативи, 15 арат болгаш 6 дузалал ажил-агыйы бо хүннерде ажилдап турар.

Бай-Тайга республикада эң хөй малдың кожуунга хамааржыр. Ында бо хүннерде чүгле шээр малдың бажы 133,8 муң, бода мал 11,8 муң, хаван 1,4 муң болгаш аът 1,6 муң баш. Бай-тайгажылар 100 баш хойдан бо чылын ортумаа-биле 85 хураганы, ол хире инектен 78 бызааны камгалап алган. 1011 тонна сүттү сагташ, кожуун иштинге сайгарып, планын 113 хуу күүсеткен. Этти 236 тоннаны белеткээн. Бо продукция планының күүсеттинмээни — кожуун-

да мал хүлээп алыр пунктуун чогуңда.

Чээрби ажыг малчынывыс бо чылын 100 баш хойдан 95-тен 158 чедир хураганнары алган. Тээли сумуда хуу малдыг Болатмаа Ортааттың коданында 1061 баш хой бар, ооң 360-ы төрүүр хой. Болатмаа Күжүгетовна 100 баш төрүүр хойдан бо чылын 158 хураганы алган. Ол кожуун рекорду болур.

Күрүнениң "Бай-Тал" унитарлыг бүдүрүлгезиниң малчыны Чочагай Сыргыт-оол оон бичи-ле чыда калбаан. Бо малчын 100-тен 155 баш хураганы алган. Үшкү черни Кара-Хөл сумудан Эректол Иргит чаалап алыр аргалыг болган. Хууда 600 кире шээр малдыг Эректол Шалович 100 баш төрүүр хойдан ортумаа-биле 130 хураганы камгалап алган.

Бо үш малчынны Тыва Республиканың Көдээ ажил-агый яамызының чарлааны "Эң эки көргүзүглерлиг малчын" деп конкурсче киирген бис.

2003 чылда республика чемпиону Чойган Биче-оол бо чылын 100-тен 120 хураганы алгаш, база-ла мурнакчыларның санынче кирген. Күрүнениң "Бай-Тал" унитарлыг бүдүрүлгезиниң бо аныяк малчыны Россия Федерациязының Көдээ ажил-агый яамызының мөңгүн медалы-биле бо чылын шаңнаткан. Медальды сайыт Алексей Гордеев Тывага кээп чорааш тывыскан.

Кожууннуң мурнакчы малчыннарынга "Бай-Тал" КУБ-тан Шолбан Салчакты, Доңмас-оол Иргитти, "Кызыл-Даг" МУБ-тан Эрес Успун-оолду, Кара-Хөл сумудан Калдар-оол Хертекти, Шуй сумудан Серен-Доржу Дары-Хөөнү дээш, өскелер-даа хамааржыр. Оларның чедишкыннеринге бай-тайгажылар чоргаарланырлар.

Часкы хову ажилдарынга "Бай-Тал" КУБ-тан трактористер Алдын-оол Маадыр, Май-оол Серен-оол, "Кызыл-Даг" МУБ-тан Доңмас-оол Оптуг-оол, Окпан-оол Сенди, сугатчылардан Шолбан Чыдат, Кайгал-оол Салчак эки киришкеннер.

Тываның Россияга каттышканындан бээр 60 болгаш Кызыл хоорайның үндезилеттинип тургустунганындан бээр 90 чылының байырлалдарында бо мурнакчыларывыс республика Наадымынга киржирлер.

**Март-оол БААВЫЛ, Бай-Тайга кожууннуң көдээ ажил-агый эргелелиниң начальниги.**

### Тываның 60 чылынга

## ТҮҢНЭЛДЕР ӨӨРҮНЧҮГ

Кызылдың экономика болгаш эрге-хоойлу техникумунуң (КЭЭТ) чөвүлели эрткен чылдың август 29-та "Юбилейлерге — 60 буянынгы үүле" деп хемчеглер планын бадылаан.

Кичээлдерни болгаш сургуулдарның ажилдарын Тываның Россияга эки тура-биле каттышканындан бээр 60 база Кызылдың үндезилеттингенден бээр 90 чыл ою-биле холбашкан болушкуннары барымдаалап тургаш тургускан.

Эрге-хоойлу эртеминиң декадаларын эрттирип турар үезинде юриктиг консультация пунктузун организаастаан.

2003 чылдың октябрьда повар, садыгжы, официант болгаш өске-даа мергежилдерни белеткээр немелде билиг салбыры ажыттыңган.

2003 чылдың сентябрь — октябрь айларында техникумнуң иштики болгаш даштыкы дерилгезин кылган, ооң девискээрин чаагайжыдып ногаанчылган.

"Билиглер хүнүнде" болгаш бирги класс шактарында сургуулдарның кичээнгеин юбилейлерже угландырган, тос айда

КЭЭТ-тиң дугайында буклетти типографтыг арга-биле чырыкче үндүрген.

Сентябрь — октябрьда башкылар чөвүлелинге сургуулдар-биле өөредилге-кижизидилгелиг ажылдың кол документтериниң бирээзи болган "КЭЭТ-тиң студенттеринге орук айтыкчызын" ажилдап кылгаш, хүлээп алган.

2003 — 2004 өөредилге чылында "Төрөөн Тывавыс болгаш бистиң Кызылывыс" деп лекторий ажилдаан. Аңаа дараазында темаларга кичээлдерни эрттирген:

(Уланчызы 2-ги арында).

### План күүсеттинген

Эрткен 6 айда агроулет-пүр комплекзи республика бюджетинче 14 миллион рубльдин үндүрүлгелерин киирген. План 101,3 хуу күүсеттинген.

Үндүрүлгелерниң кол нуруузу арага продукциязының акциз чыылдазындан (44,3 хуу) болгаш чаңгыс аай социал үндүрүгден (24,1 хуу) кирип турар. Акциз чыылдазын чүгле чаңгыс бүдүрүлгө — "Саян-Алко" акционерлиг ниитилел күүсеткен.

Республиканың болбаазырадылга бүдүрүлгелери үндүрүг-

лер, чыылдалар планын 85,8 хуу күүсеткен. Ооң күүсеттинмейн барганынга бүдүрүлгө черлериниң саң-хөө берге байдалы салдарлыг болган. Карылгалыг ажилдаан Кызылдың куш фабриказы, "Макарон улетпүрү" КУБ республика бюджетинче үндүрүлгө болгаш чыылдалар төдөвейн турар.

Тыва Республиканың Көдээ ажил-агый яамызы үндүрүлгө планы күүсетпейн турар бүдүрүлгелерниң удуртукчуларынга четпестерни чок кылыр дээш ажилдаарын даандырган.

### Мал ажыпының продукциязы өзүлделиг

Бо чылдың бирги чартык чылында Тыва Республиканың көдээ ажил-агый барааннарының бүдүрүкчүлери 571,7 миллион рубльдин продукциязын бүдүрүп үндүрген. Ол эрткен чылдың ол үезинге бодаарга, барык 82 миллион рубль хөй.

Мал ажил-агыйының продукцияларының бүдүрүлгези база өзүлделиг. Бо чартык чылда эът бүдүрүлгези эрткен чылдың ол үезинге бодаарга, 6,4 хуу, (380 тонна), сүт 23,4 хуу (3,4 тонна), дүк бүдүрүлгези 22,2 хуу (118 тонна) көвүдээн. Ынчалза-даа мал продукциязының бүдүрүлгезин Мөңгүн-Тайга, Чеди-Хөл, Өвүр, Сүт-Хөл кожууннар эвээжеткен. Сүт саалдазы Би-

Хем болгаш Улуг-Хем кожууннарда база кызырылган, а Кызылдың куш фабриказы КУБ дагаа чуургазының бүдүрүлгезин мырыңай 80 хуу эвээжеткен.

Тыва Республиканың Көдээ ажил-агый яамызының коллегиязы көргүзүглерин кудулаткан кожууннарының көдээ ажил-агый эргелелдериниң начальниктеринге боттарында тургустунган байдалды анализтээш, четпестерни эдип алырын, чер-черлерде көдээ ажил-агый продукцияларын болбаазырадыр бүдүрүлгелерниң үзүктелишиин чок ажилдаарын хандыраарын хүлээндирген. Көргүзүглерин эвээжеткен кожууннарының четпестерин эдип алырының хемчег планы бадылаттыңган.

Бистиң корр.

## Дыңнадыг

Тыва Республиканың Улуг Хуралының Хоойлу-жудулга болгаш Төлээлекчилер палаталарының депутаттарының 2004 чылдың октябрь 17-де болуп эртер немелде болгаш катап сонгуудаларының мурнунда суртаал материалдарын "Шын" солунуң арыштарынга халас болгаш өртектиг чырыдарынга херек парлагга шөлүн ук солунуң редакциязы берип турар.

Кандидат бүрүзүнге халас суртаал ажылынга — 80, а өртектиг — 160 дөрбөлчүн сантиметрин "Шын" солунуң редакциязы берип турар. Өртектиг парладырга солун шөлүгүн бир дөрбөлчүн сантиметриниң өртээ — 30 рубль, дүрген парлааны дээш (ийи хонук дургузунда) — 35 рубль, немелде шрифтилерлиг болгаш шыйыгларлыг болза — 40 рубль.


Бир эвес берген материалдар сонгулда, реклама болгаш массалыг информация чепсектериниң дугайында хоойлуга дүүштейн турар болза, редакция ону парлаарындан ойталаар эргелге.





## САЙЗЫРА-ЛА, ТЕВЕ-ХАЯ

Теве-Хаяның 70 чылынга



## БУРУНГААР ХӨГЖҮЛДЕНИҢ ДЕМДЕКТЕРИ

1934 чылда Тываның көдээ ажил-агый дуржулга станциязын Теве-Хаяга организастан. ТАР-ның бирги эртем-шинчилел албан чери ол болган. ССРЭ-ден чаладып келген эртемденнер орта ажылдаары-биле чедип келирге, оларның ажылдаар, чурттаар оран-савазы херек болу берген. Ынчангаш суурну тудары чугула айтырыг турган. Баштай контораны, чуртталга бажыңнарын, ясли-садикти, магазинни, пекарняны, чунар-бажыңны, эртем-шинчилел ажылдары кылып албан черлерин туткан. Суурну Теве-Хая деп адаан.

Көдээ ажил-агый дуржулга станциязының эртем ажылдакчылары эртемге үндөзүлгө, чер ажылының үнүш-дүжүткүрүн бедидер, малдың уксаазын экижидер, продуктулуун бедидер дээш улуг ажылды кылып чорутканнар. Ынчангаш бо эртем албан чери барыын кожууннарның болгаш республиканың мал, чер ажылын хөгжүдөр херекке биче эвес үлүүн кириген. Дуржулга станциязын 1962 чылда Таңдының Дүргенче (Сосновкаже) шилчидипкен, ооң баазыңга «Тыва» совхозту тургускан, ол мал семирти азыраар ажил-агый болган. Теве-Хаяга янзы-бүрү нацияның кижилери эп-найралдыг, бир демниг ажылдап тургаш, бо черниң социал экономиказын хөгжүткен, чон тодуг-догаа чурттап турган.

Эрткен чүс чылдың тозан чылдарының төнчүзүнде рынок экономиказынче шилчилгениң кончуг берге чылдарында совхозтуң, суурнуң ажил-агый буураан, акша-көпөөк, кыварчаар материалдар чок, барааннар, аш-чем аймаа ховартаан, ертээ аартаан. Мооң чылдагааны-биле Теве-Хая сумузунун чурттакчы чонунуң амыдырал-чуртталгазынга элээн берге байдалдар таварышкан. Ону ажып эртер дээш тодаргай хемчеглерни алган бис. Бот-башкарнып тургаш, боттары боттары хандыртынары ажыктыг деп санааш, албан черлеринден эгелээш хуу хамаатыларга чедир



тараа, картофель, ногаалар аймаа тарыыр, мал өстүрер ажылды организастан киргеш, каш чыл эрткенде багай эвес түннелдерни чедип алдывыс. Амгы үеде сумунуң албан черлери, хуу кижилери мал болгаш чер ажылының продуктулары-биле хандыртылган, амыдырал-чуртталга чүгээртээн.

Социал адырның албан черлеринин ажил-чорудулгазын экижидеринче кичээнгеини салган, септелгезин чоруткан, дериг-херекселдер-биле четчелээн. Кудумчуларны корумчурумчуткан, херимнээ, агарты чугайлаан, чагайжыткан. Ынчангаш бурунгаар хөгжүлдениң демдектери көстүп келген.

Тываның Россияга катгышканының 60, Кызылдын тургустунганының 90 база Теве-Хаяның

70 чылдарының байырлалдарына чедишкиннерлиг ужуражыр дээш сумунуң чурттакчы чону шалыпчы ажылдап турарлар. Мооң түннелинде мал, чер ажылында, социал адырда, чагайжыдылгада болгаш өске-даа ажил-херекте кылган чүүлдеривис бар. Эң-не кол айтырыг чонунуң амыдырал-чуртталгазын экижидери болуп турар. 336 ереге бар, оларның колдуу ногааларны, картофельди тараан, тараа культураларын өстүрүп турарлар эвээш эвес. Малдың баш саны чыл келген тудум-на көвүдөп орат. Мал болгаш чер ажылындан алган продуктуларының артыкшылы чон саткаш, акша-төгөрикти ажылдап ап турар болу берген. Чон хуузунда 56 чик машиналыг болгаш өске-даа янзы-бүрү техникалыг. Чылдан чылче чоннуң саны немежип турар.

Сумуда ийи уруглар сады, эмнелге, школа, Культура бажыңы, библиотека, харылзаа чери, хереклекчилер ниитилелиниң болгаш хуу магазиннер чонга бараан болуп ажылдап турар. Оон ангыда «Хемчик» муниципалдыг бүдүрүлгө, «Девээли-Хая» көдээ ажил-агый бүдүрүлгө катгыжышкыны, беш арат ажил-агый сумуда бар. Олар шуптузу байырлалдарда белеткелди чорудуп, боттарының мурнунда салдыпкан хүлээлгелерин күсседип, багай эвес ажылдап турарлар. Ниитизи-биле алырга сумунуң албан организациялары, чурттакчы чону Теве-Хаяның болгаш көдээ ажил-агый дуржулга станциязының тургустунганының 70 чылының байырлалын төлөптиг уткааннар, ам болур республиканың юбилейлерин ажылынга чедишкиннерлиг уткуурунга бүзүрөлдиглер.

Елизавета ГРАЧЕВА,  
Теве-Хая суму чагыргазының даргазы.

## ТӨӨГҮДЕН ОДУРУГЛАР

1934 чылда Москвадан көдээ ажил-агый эртемденнери чедип келгеш, кара суг кыдыыңга чээрби ажыг майгынарна, чамдыктары казанак бичи бажыңнарга чурттап турган. Суурну тудуп тургузары чугула херек болу бээрге, бо черниң шевер араттары Дуюза Ондар, Адыя Донгак, Самбуу Монгуш, Ойдуу Ооржак, Бүрбүжап Куулар болгаш өскелер-даа Адар-Төштүң Кара-Сугга экспедиция турган черниң бажыңнарын Теве-Хаяга көжүрүп эккелгеш, баштай контораны, эртемденнерниң чурттаар ниити чуртталга бажыңын болгаш өске-даа объектилерни тутканнар. Ынчангаш олар суурнуң үндөзүниң салган кижилер болган.

1940-1942 чылдарда эртемден Казанцеваның удуртулганы-биле бөлүк тыва кыстар суурнуң ортузунга чимистиг сад тарып эгелээн. Орта янзы-бүрү сорттуң яблонязын, сливазын, вишнязын, грек тоорукту, малинаны, инек-караан, кызыл-катты болгаш өске-даа чимистиг үнүштерни тараан. 1948 чылда чимистиг сад дүжүдүн элбээ-биле берип эгелээн. Александра Куулар, Хензиг Куулар, Ольга Ойдуу, Нина Донгак, Чучун Ооржак болгаш өскелер-даа чимистиг үнүштер, ногаалар аймаа өстүреринге орус эртемденниң дузазы-биле мергежилди кижилер болу берген. Сөөлгү чылдарда Ольга Ооржак чимистиг садтың ажил-чорудулгазын удуртуп чораан. Олар бо чугула херекке дыка хөй

кижилерни өөрөткен.

Суурнуң ортузун куду агып бадып чыдар кара суг ынчан кончуг терең, шапкын турган болганындан аңа тараа дээрбедээр суг дээрбезин кылган турган. Аңаа чүгле суурнуң улузу эвес, барыын кожууннарның хамаатылары тараазын дээрбеледип алыр чораан.

Кончуг челер, маңнаар, чыраалаар айттарны айт ажаакчылары Иван Устинов, Иван Горбунов, Семис-оол Куулар болгаш өскелер-даа ажаап өстүрүп, өөредип турганнар. Кызылга наадымнарга болгаш өске-даа маргылдааларга ол айттар киришкеш, ыяп-ла шаңналдыг черлерни алыр турган. Дуржулга станциязының удурткучуларынга айттарны директорнуң дужалын езугаар быжыглап каар турган. 1957 чылдың май айда дужалда мынчаар айткан: «Л.Я. Гладковка «Хорошийни», И.Т. Кызылоолга «Каурааны», В.А. Быстровка «Гнедуха №16-ны»... быжыглаар».

Бо черниң үндөзүн чурттакчыларының чугаазындан алырга, дуржулга станциязының баштайгы директорунга Долмажап ажылдап турган. Оон дараазында чылдарда Кижир-оол, Вапун Ондар, Негей Соян, Михаил Казанцев, Амагиров директорлап ажылдаан. Сөөлгү чылдарда Илья Кызылоол, Соян Сонам бо албан-хүлээлгени күсөткеннер.



Теве-Хая ортумаа школазының өөреникчилери ногаалар ажаалдазында.

## ТЕВЕ-ХАЯ

Теве-Хая төрөөн черим,  
Тевек ойнап сеңээ өстүм,  
Барык шөлүң шимеп

Барыксанчыг  
шөлөөн-дир сен.

Дөлгөм хову ортузунда  
Хая-даштан силбиттинген,  
Теве ышкаш тейжигешти  
Хаяалыг хүн оттуруптар.

Эртенги хүн херелдери  
Саарыланьп ойнай бээрге,

Эрте шагда тоолда буура  
Сагыжымга кирер чорду.

Чагай тараа чаның дургаар  
Чапты берген чалгып чыдар.  
Дазыр шөлде тараа, ногаа  
Даамалдап чыткан дег сен.

Мөңгө тевем сеңээ барып,  
Тейин суйбап эргелетсе.  
Мөгөннериң аразыңга  
Тепкиленип чассып алза.

Виктор ЧОПТУН-ООЛ.

## КҮШ-АЖЫЛЧЫ ҮЛҮҮН КИИРГЕН

Содуна Сазыгбанович Ондар — Теве-Хаяның көдээ ажил-агый дуржулга станциязының ажил-агыйын хөгжүдөргө төлөптиг үлүүн киригеннерниң бирээзи. Аныяк оол баштайгы чылдарында мал ажылынга киргеш, бо херекке бердингенин көргүскөн. 1944 чылда көдээ ажил-агый техникумунга түр курс дооскаш, дуржулга станциязының сүт-бараан фермазының эргелекчинге, 1948-1960 чылдарда кол зоотехник болуп ажылдаан. Ынчан симменталь инектерни хүнде үш катап саар, бир инектен-на 30 литр сүттү саап алыр турган. Оларның ажаалдазы, чөмгөрлөгө эки болганындан хөй продукцияны бээр. Бүдүрүкчү бугаларны инектерден аңгы ажаар, чөмгөрер турган.

Оларның иштинден «Авангард» деп шолалыг буга кайгамчыктыг улуг, шырак болган. Ооң деңгизи 1470 кг четкен. Ол кончуг күчүтөн амытан инектерни бертип туруп бээрге, Москваның улус ажил-агыйның чедишкиннеринин делгелгезинге берипкен. Шак мындыг эки ажил-херекти бүдүреринге Содуна Ондар бодунун билиин, күжүн, арга-дуржулгазын кириген.

Дуржулга станциязы көжүп чоруй баарга, «Тыва» совхозтуң кол зоотехниктинге ону томуйлаан. Ооң ажылдап турган чылдарында ажил-агыйның шээр малының баш саны өскөн, бээр продукциязы көвүдээн. Ол чүл дээрге мал ажылының тускай эртемниинин бодунуң херезин

эки билерин көргүзүп турар.

Содуна Сазыгбанович чуртталгазының сөөлгү чылдарында совхозтуң ажилчын комитетинин даргазынга ажылдааш, бо хүлээлгезин база-ла ак сеткелдиг күсөткен. Ооң эргезинге турган көдээ клуб тергенин дериттинген, бот-тывынгыр уран чүүл доктаамал ажылдап, көрүлдөлөргө ыяп-ла шаңналдыг черлерни алыр турган.

Төлөптиг ажылдакчының өгбүлөзи сес ажы-төлдү өстүрүп кижизиткен. Олары шуптузу бодунуң төрүттүнгөн, өскөн, күш-ажылчы базымнарын алган ынак Теве-Хая суурдан кеже бербээн, ооң социал экономиказын сайзырадыр херекке үлүүн кирип чоруурлар.

Арынны Таан-оол ХЕРТЕК, Василий БАЛЧЫЙ-ООЛ  
белеткээн.



## Юбилейлерге уткуштур

## ЧҮГЛЕ УГААН, КҮЗЕЛ ХЕРЕК

Тываның хөй националдыг күчүлүг совет күрүнениң составына каттышканын бээр 60 чыл болуп турар. Кижини назыны хире шак бо үе дургузунда Тываның болгаш ооң хамаатыларының амыдыралына болган чаартылгаларның дириг херечилериниң бирээзи мен. Тодаргай каш чижектен кирирейн.

Бүгү Тыва чаңгыс аай электротехника системасын улаттынып, дүн-хүн дивейн, электри энергиязын ажыглап эгелээн. Чаа-чаа колхоз-совхозтар, суурлар тургустунган. Фабрика-заводтар туттунган. Улуг-Хемни кержилдир 3 улуг көвүрүг салдырган. 70 чылдарда Кызылдың мурнуу талазына бүдүн хоорайжыгышты туткан. Агаар, суг, орук аргы-жылгазы сайырап, экижи эгелээн. Машина-техниканың саны көвүдээн. Ооң-биле чергелештир кижилерниң угаан-медерели сайзыраан. Эртемниг кижилер чылдан чылче немежил турар. Компьютер техниказын барык школачы бүрүзү билер апарган.

Эки чүвени эки дээр бис. Чуртталга 40 чылдарга бодаарга, магалыг апарган-дыр. Шупту чүве бар, чүгле угаан, күш, күзел херек. Амыдыралдың үндезинери – аыш-чем, идик-хеп, дериг-херексел дээш, оон-даа өске чугула чүүлдер анаа-ла боттары кижини аксынче кирип келбес. Ынчангаш чүнү-даа канчаптып болурунун аргазы бар магалыг бо

үеде чүгле шудургу күш-ажылдан бүгү кежик хамааржыр.

Төөгүвүске артар бо улуг байырлалды бүгү тала-биле эки уткуур деп бодаар болза, кижини бүрүзү бодунун эрткен оруун, амгы болгаш келир үезин хынамчалыг көрүп, «төрээн Тывамның сайзыралына демек кылдыр оода чаңгыс ыяш олурткан мен бе» деп шүгдүнер болза эки деп санаар мен. Хүнүнде хлеб бар-чогу бодавайн, даартагы хүнну бодап, каш чыл эртсе, амыдырал канчап баарыл, ону моон-даа ыңай экижидерде чүнү кылырын бодап чурттаар ужурут бис.

Төрээн Тывамның, төрелдешкен чонунун бо кел чыдар улуг байырлалына бодум хирешаам-биле белеткенип, чурттап олурар бичии бажынынның де-вискээрин арыг-силег тургузуп, келир кышка четчири-биле ыяшты, сигенни, картофель, ногаа аймаан белеткээр деп сорулга салып алган чурттап олур мен.

Биче-оол СОЯН,  
пенсионер.  
Тес-Хем кожуун, Куран суур.

## ӨӨРҮП ЧЕТТИРГЕНИМНИ ИЛЕРЕДИЙН

Бир эвес 1939 чылда ачамны эдерип, Кызылга чорумал кижини бооп кээп чораан болзумза, 1943 чылдан эгелээш эртембилег чедип ап, өгленген черим – Кызыл болган. Уругдарымынның эртем-билег алган чери, ажылдап-чурттап турар чери база – Кызыл. Күш-ажылчы базымны эгелээн черим – Кызыл.

Өөренип-даа тургаш, албан черлеринге, организацияларга-даа ажылдап тургаш, шеф ажылынга чеже катап киришпээн, кудумчуларны чаагайжыдар, оруктар, тротуарлар кыйынынга чеже ыяшты олуртпаан дээр ону. Ам кайгамчык чараш асфальтылыг, ногаан ыяштарлыг кудумчулар, хөй каят чуртталга бажыңнары, клуб, культура бажыңнары, ортумак болгаш дээди өөредилге черлери, школалар, профтехучилищелер, техникумнар, театрлар, кинотеатрлар, спорткомплексстерни көргөш, магадаар, өөрүүр-дүр мен.

Кызыл – хөй нациялыг чоннарның хоорайы. Мынчага дээр чурттааш, тыва, орус, хакас, бурят, якут, украин, татар, моол, кыргыз, немец, алтай – кандыг омак-сөөктүг улус-биле ажылдаваан, кожа чурттаваан дээр. Езулуг эп-найрал деп чүвени көргөн-даа, чурттап эртип-даа чор мен.

1953 чылда шериг албанындан халажып келгеш, чайын «Шын» солунун редакциязынга корреспондентилеп ажылдаан мен. Мени ажылга хүлээп алган кол редактор – Оюн Араптанович Толгар-оол. Ол ам бистин аравыста чок. Кончуг-даа аргадуржулгалыг, хоочун журналистер-биле ажылдап турдум. Удаваанда Толгар-оол дарга Тываның партия обкомунче депшип чорупкан. Редактор Донгак Одай-Сюрюнович Бегзи апарган. Үр чылдарда ажылдаан дуржулгалыг чогаалчылар: Байкара Хөвөңмей, Салчак Тамба, Салчак Самба-Людуп, Монгуш Людуп, Түлүш Кызыл-оол, Сергей

Кызыл-оол, Алексей Содунам, Монгуш Топчаа, Тываның эң баштайгы хоочун башкызы Алдын-Херел дээш, оон-даа өскелер меңээ, анык ажылдакчыга, арга-дуржулгазын күзелди-биле дамчыдып берип чорааннар.

Кызылга чурттап чораан угтам Монгуш Чымбаевна Часкыл ТАР үезинде Тываның херээженнер килдизиниң даргазы чораан. Кажан ТАР РСФСР-ниң составына автономнуг область бооп каттышканда, Тываның партия обкомунун херээженнер килдизинге ажылдап чорду. Честем Шалчыма Сызынмаевич Салчак Тываның Дээди судунга ажылдап турду. Олар ам кайызы-даа чок, мөчээ. Оларны ачызы-биле мен эртем-сургуул чедип ап, комсомолдун-даа, партияның-даа дээди школаларын доостум.

Тываның 60 база Кызылдың 90 чыл оюн таварыштыр ынак хоорайымның чурттаачыларына байырымны чедирип, бистин аравыста ам чок-даа болза, мени өөредип кижизиткен Кызылдың №2 тыва ортумак школазының башкыларына Алексей Макуроолович Белек-Баирге, Ася Александровна Федченкога өөрүп четтиргенимни илередин, кады өөренип чораным өөрлерим – Тывага бир дугаар он классты алдын медаль-биле дооскан Андрей Чычаан-оолга, мөңгүн медальдың эдилекчизи Юрий Аранчынга болгаш өскелерге черге чедир мөгөөрдир мен.

Дарган-оол ЕНДАН,  
ТР-ниң культуразының алдарлыг ажылдакчызы.

## «ЭРЕС-ДИДИМ ООЛ»

Тываның анык шырдаачылары Долаан Салчак, Костя Кан, Идам Ичин-Норбу болгаш Артыш Ондар Новосибирск хоорайга улустар аразының «Эрес-дидим оол» деп фестивалына киришкеш келген.

Бо чылын 14 дугаар эртип турар бо фестиваль Казахстандан, Сибирьден база Екатеринбургтан Сахалинге чедир 14 областардан 7-14 харлыг 200 хире киржикчилерни хаара туткан. Киржикчилерни харназы аайы-биле 4 бөлүкке чарган, швейцар система-биле 9 чадага оюнунун түңнелинде Костя Кан биле Долаан Салчак бирги, үшкү черлерни чаалап алганнар. А Идам Ичин-Норбу ийи аңгы бөлүкке сан талазы-биле ийги база дөрткү черлерни үлешкен.

Фестивальга 2 оол, 1 уругдан тургустунган командалар аразына маргылдаага бирги черни новосибиржилерниң шыырак дээн белеткелдиг «Гамбит» командасы ээлээн. Шаңналдыг черлерни ээлээн-



нерге база киржикчилерге

«Холидей-классик» деп маркетингилер каттыжышкынының фирмазы белектерни тывысқан.

Школачылар аразына шырдаа маргылдааның Новосибирск областьының чагыргазы болгаш немелде өөредилге төвү «Факелдиң» бекдик денелге эрттиргени демдеглексенчиг. Тыва Республиканың Өөредилге яамызының Уругларның спорт школазының ачызы-биле фестивалга чораан бичии тыва гроссмейстерлер маргылдаага киржиринден аңгыда, академхоорайга чурттаваашаан, эштип, кадыкшылын быжыглап дыштаныр аргалыг болган.

Н.ШИШИГИН,  
бөлүктүн удуртукчузу.  
ЧУРУКТА: Артыш Ондар оюн үезинде.

## ОШАЧКИ ДЫҢНАДЫП ТУР

## ОРУККА ОВААРЫМЧАЛЫГ БОЛУР

Тыва Республиканың ОШАЧКИ ажылдакчылары 2004 чылдың эрткен 7 ай дургузунда орук шимчээшкенин айыыл чок болдурарының талазы-биле улуг ажылды чоруткаң.

Орук озал-ондаан эвээжединче угланган профилактиктиг хемчеглерни боттандыгар дээш күш-ажылчы коллективтерге 374 ужуражылганы эрттирген, өөредилге черлеринге 270 лекцияны номчаан.

ТР-ниң ОШАЧКИ-ниң чанында орук постулу албан чериниң ителге салбыры база ОШАЧКИ-ниң Кызылда салбыры «Вихрь-антитеррор», «Корум-чурум камгалалы» операцияларына, «Пешеход», «Эзирик чолаачы» рейдилеринге киришкен. Рейдилер үезинде 251 эзирик чолаачы туттурган, 1210 орук шимчээшкенин дүрүмнерин хажыткан таварылгаларны бүрүткээ, 182 кижини эзириктер сергедир черлерге кириген, 34 хамаатыны ИХК-ның дежурный кезектеринче чедирген.

Орук шимчээшкенин хайгаараар ажылдар үезинде ОШАЧКИ ажылдакчылары 27131 орук шимчээшкенин дүрүмнерин хажыткан таварылгаларны илере-кен, 2318 эзирик чолаачыны туткан, 1270 херекти судче чоруткан, оларның иштинден 159 чолаачы техника башкараар эргезин казыткан. Торгаалдың нийти хемчээли 3121225 рубль болган, оларны 1129737 рубльди төлеткен.

Бо хуусаа иштинде озал-ондак саны 2,0 хуу кудулаан-даа болза, амы-тынындан чарылган кижилерниң саны 28,8, а кемдээн улустун саны 8,6 хуу өскөн. Эзирик чолаачыларны хайындан 34 орук озал-ондаа болган.

Республика иштинге бүрүткеттинген орук озал-ондааның 50 хуузу Кызылдың девискээринге болган. Танды, Тес-Хем, Чөөн-Хемчик, Сүт-Хөл, Мөңгүн-Тайга, Чаа-Хөл кожууннарында база Ак-Довурак хоорайларда орук озал-ондактарының саны өзүп турар. Хүндүлүг чолаачылар!

Удавас сентябрь, уруглар

руль артынче олурбанар;

♦ хоорайның кудумчуларына халдып чорааш, дүргенин хемчээлдерин база айыыл чок болур хемчээлди сагып, орук демдектериниң негелделеринге чагыртып турунар;

♦ орук шимчээшкенин чадаг киржикчилеринге, ылагы бичии уругларга, кичээнгейлиг болунар. Орук эртер шыйыларга чоокшулап келгеш, машиналарны оожумнадып, чадаг кижилерни эрттирер;

♦ орук шимчээшкенин шаптык болдурары-биле автомашиналарны чогуур черлерге доктаадып, тургузуп турунар;

♦ орук озал-ондаа болган черден дезипкени дээш кеземче харысалгазы онаажыр дээрзин утпаар;

♦ школалар чанынга келгеш, онза кичээнгейлиг болунар.

## Уругларның кичээнгейинге!

Эргим уруглар, 2004 чылдың сентябрь 9-тан 1-ке чедир бистиң республикамыстың төвү Кызылга Тываның Россияга каттышканының 60, Кызылдың тургустунганындан бээр 90 чыл оюн байырлап эрттирер болгай бис.

Ол хүннерде хоорайга машина-балгат көвүдээр, ынчангаш силерниң кадыңарга болгаш амы-тыныңарга кичээнгейни улгаттырары-биле дараазында орук дүрүмнерин сагыр чугула:

орукка чадаг-терге мунуп алгаш чоруурунарда кичээнгейлиг болунар (чадаг-тергени 14 хар четпээн уруглар, оолдарның орукка мунары хоруглуг);

кудумчу кежерде чүгле чадаг кижилерниң эртери-биле тускай кылып каан оруктан эртинер.

Бир эвес 14 хар четпээн болзунарза, орукка чадаг-терге мунмай, аңаа көрдүнген тускай шөлчүгештерге, паррка, бажыңнар чоогунга азы стадионга мунуп болуп силер.

Орук шимчээшкенин чурумун хажыдары, чадаг кижилерниң орукка шын эвес алдынары – орукка озал-ондакты тывылдырып, хөй бичии чаштарны бертик-межел кылып, харын-даа амы-тынындан чарып турар. 2004 чылдың эрткен 7 айының иштинде бистиң республикамыс иштинге 31 орук айыыл-халавы назы четпээн уругларның киржилгези-биле болган. Ооң иштинде 7 назы четпээн уруглар амы-тынындан чарылган, 28 кижини янзы-бүрү кемдээшкенин алган болуп турар. Ынчангаш, эргим уруглар, оваарымчалыг болунар!

Эрес-оол ХААЖЫК,  
ТР-ниң ОШАЧКИ-ниң начальниги, милицияның подполковниги.



